

REGLUGERÐ

um fjárhagslega aðstoð við framfærendur fatlaðra.

1. gr.

Fatlað barn eða ungmenni að 18 ára aldri, sem dvelur í heimahúsi eða sem nýtur takmarkaðrar þjónustu og þarfnast sérstakrar umönnunar eða gæslu að dómi svæðisstjórnar, á rétt á aðstoð eftir því sem við verður komið. Viðkomandi svæðisstjórn skal sjá um að aðstoð þessi verði veitt.

Kjósi framfærendur að annast þetta sjálfir eða ekki er völ á öðru og telji svæðisstjórn og viðkomandi greiningar- og ráðgjafaraðili þá til þess hæfa og aðstoðina nauðsynlega, skulu framfærendur eiga rétt á fjárhagsaðstoð skv. reglugerð þessari.

2. gr.

Með hugtakinu fatlað barn eða ungmenni skv. 1. mgr. 1. gr. er átt við:

1. Andlega fötluð börn og ungmenni, vegna greindarskerðingar eða geðrænna truflana.
2. Líkamlega fötluð börn og ungmenni, vegna blindu eða verulegrar sjónskerðingar, verulegrar heyrnarskerðingar eða hreyfihömlunar.
3. Fjölfötluð börn og ungmenni, vegna hömlunar á fleiri en einu sviði.
4. Börn og ungmenni sem vegna langvinnis sjúkdóms eða slyss verða fyrir varanlegri skerðingu á þroska eða hreyfigetu.

Með sérstakri umönnun eða gæslu skv. 1. mgr. 1. gr. er átt við umönnun barna, sem vegna fötlunar sinnar

1. eru öðrum háð með hreyfifærni eða flestar athafnir daglegs lífs;
2. þurfa verulega gæslu, t.d. vegna geðrænna einkenna, atferlis eða alvarlegs sjúkdóms;
3. þurfa markvissa daglega þjálfun.

3. gr.

Svæðisstjórn metur vinnuframlag framfærenda vegna sérstakrar umönnunar og gæslu, og skal greiða fyrir allt að 175 klst. á mánuði samkvæmt 8. texta Verkamannafélagsins Dagsbrúnar. Þann 1. nóvember 1989 er sambærilegur taxti 2.A. eftir 10 ára starf, kr. 42.172.

Tryggingastofnun ríkisins annast greiðslur í samræmi við ofanskráð.

Við útreikning á greiðslu til framfærenda leggur svæðisstjórn eftirfarandi viðmiðun til grundvallar, byggða á upplýsingum frá greiningaraðila og framfærendum:

I. Flokkun vegna umönnunar- og gæsluþarfar miðað við stig fötlunar og aldur barns.

1. Börn sem vegna mjög alvarlegrar fötlunar (fjölfötlunar) eru algerlega háð öðrum með hreyfifærni og/eða flestar athafnir daglegs lífs.
2. Börn með fatlanir á háu stigi, t.d. alvarlega þroskahömlun, verulegar hreyfihamlanir eða alvarlega tjáskipta- og tengslaskerðingu.
3. Börn með miðlungsvægar fatlanir, t.d. miðlungsvæga þroskahömlun eða hreyfihömlun.
4. Börn með vægari fatlanir, t.d. væga þroskahömlun, málhamlanir.
5. Börn sem vegna eðlis fötlunar eða aldurs þurfa sérstaka umönnun fyrst og fremst vegna þjálfunar og heimsóknar til sérfræðinga.

II. Greiðsluviðmiðun m.t.t. ofangreindrar flokkunar og daglegrar þjónustu utan heimilis er þessi:

	Minna en 2 klst.	Meira en 2 klst. Minna en 4 klst.	Meira en 4 klst. Minna en 6 klst.	Meira en 6 klst. Minna en 8 klst.	Meira en 8 klst.
1.fl.	175 klst.	153 klst.	131 klst.	87.5 klst.	44 klst.
2.fl.	153 klst.	131 klst.	87.5 klst.	44 klst.	
3.fl.	131 klst.	87.5 klst.	44 klst.		
4.fl.	87.5 klst.	44 klst.			
5.fl.	44 klst.				

4. gr.

Svæðisstjórn getur gert tillögur um hærri greiðslur en getið er í 3. gr., þó aldrei meira en 175 klst., þegar mjög brýna nauðsyn ber til. Skal svæðisstjórn senda félagsmálaráðuneytinu ítarlega rökstudda greinargerð í slíkum tilfellum, sbr. 2. mgr. 6. gr.

5. gr.

Hafi barn, sem á rétt á greiðslum skv. reglugerð þessari, notið greiðslu barnaörorkustyrks skv. lögum um almannatryggingar, skulu greiðslur skv. þessari reglugerð ekki greiddar nema barnaörorkustyrkur hafi áður verið felldur niður.

Framfærendur fatlaðra á aldrinum 16–18 ára, sem njóta örorkulífeyris og tekjutryggingar samkvæmt lögum um almannatryggingar, eiga rétt á greiðslum skv. 3. gr. reglugerðarinnar sem nemur þeim mismun, sem kann að vera á upphæðum þeirra og greiðslum samkvæmt reglugerð þessari.

6. gr.

Umsóknir framfærenda um greiðslur samkvæmt reglugerð þessari skulu sendar hlutað-eigandi svæðisstjórn á eyðublöðum sem félagsmálaráðuneytið lætur útbúa og svæðisstjórnir afhenda. Greiningaraðili skal senda svæðisstjórn upplýsingar um fötlun og aðstæður umsækj-anda á samræmdu eyðublaði.

Svæðisstjórn skal kanna vandlega aðstæður hins fatlaða. Meti hún framfærenda hæfan til að annast þessa þjónustu og uppfylli hann sett skilyrði, sendir hún félagsmálaráðuneytinu umsóknina ásamt mati sínu og tillögum um greiðslu.

Hafi félagsmálaráðuneytið ekki athugasemdir við tillögur svæðisstjórnar, úrskurðar ráðuneytið í málinu og sendir til Tryggingastofnunar ríkisins sem annast greiðslur.

Greiðslur hefjast frá 1. degi þess mánaðar sem umsókn berst til svæðisstjórnar. Í sérstökum tilvikum er félagsmálaráðuneytinu heimilt, að fenginni rökstuddri umsögn svæðis- stjórnar, að greiða allt að 3 mánuði aftur í tímann.

7. gr.

Svæðisstjórn skal fylgjast reglulega með högum hins fatlaða og framfærenda hans. Verði breyting á högum viðkomandi, sem kann að leiða til breytinga á forsendum fyrir greiðslu, skal svæðisstjórn þegar í stað tilkynna þær skriflega til félagsmálaráðuneytis.

Framfærendum, sem njóta fjárhagsaðstoðar samkvæmt reglugerð þessari, er skylt að tilkynna svæðisstjórn um aðstæður sem kunna að hafa í för með sér breyttar forsendur fyrir greiðslum.

Svæðisstjórnir skulu kynna framfærendum, sem njóta aðstoðar samkvæmt reglugerð þessari, efni reglugerðarinnar ítarlega.

8. gr.

Svæðisstjórnir, ásamt greiningar- og ráðgjafaraðilum, skulu endurmeta árlega forsendur greiðslna, séu þær ekki bundnar fyrirfram til ákveðins tíma og gera ráðuneytinu skriflega grein fyrir endurmati. Að öðrum kosti falla greiðslur niður.

Dveljist fatlaður, sem undir reglugerð þessa fellur, á sjúkrahúsi eða í skammtímavistun, falla greiðslur niður einum mánuði eftir að vistun hefst. Heimilt er félagsmálaráðuneytinu að víkja frá þessu mæli ríkar ástæður með, t.d. yfirseta framfærenda.

Sumarorlof skólabarna hefur ekki áhrif á greiðslur skv. reglugerð þessari.

9. gr.

Um ágreining vegna framkvæmdar reglugerðar þessarar fer samkvæmt 3. gr. laga nr. 41/1983, um málefni fatlaðra.

10. gr.

Reglugerð þessi sem sett er samkvæmt 10. gr., sbr. 12. gr. laga nr. 41/1983, um málefni fatlaðra, öðlast gildi þann 1. febrúar 1990. Frá sama tíma er úr gildi fallin reglugerð nr. 457/1984 um fjárhagslega aðstoð við framfærendur fatlaðra.

Ákvæði til bráðabirgða I.

Hafi einstakar greiðslur, sem úrskurðaðar voru skv. reglugerð nr. 457/1984 um fjárhagslega aðstoð við framfærendur fatlaðra, verið úrskurðaðar til lengri tíma en til 1. janúar 1990, skulu þær halda gildi sínu til þess tíma er úrskurðurinn nær.

Ákvæði til bráðabirgða II.

Börn, sbr. 2. mgr., sem fullnægðu skilyrðum reglugerðar nr. 457/1984 um greiðslur til framfærenda, en falla ekki undir reglugerð þessa, skulu njóta greiðslna fram til 30. júní 1990.

Með börnum er í ákvæði þessu átt við börn sem haldin eru lífshættulegum eða langvinnum sjúkdómum, svo sem krabbameini.

Til viðmiðunar á greiðslum eru eftirfarandi reglur, sbr. flokkun í 3. gr. reglugerðar þessarar:

- Fl. 1. Langvarandi stöðug sjúkrahúsvistun eða yfirseta foreldra í heimahúsi, t.d. vegna lyfjagjafar eða einangrunar.
- Fl. 2. Reglulegar þéttar lyfjagjafir eða geislameðferð með tíðum sjúkrahúsinnlögnum.
- Fl. 3. Reglulegar lyfjagjafir á sjúkrahúsi.
- Fl. 4. Reglubundið eftirlit, stopular lyfjagjafir eða lyfjagjafir í töfluformi.

Félagsmálaráðuneytið, 13. desember 1989.

Jóhanna Sigurðardóttur.

Berglind Ásgeirsdóttir.

AUGLÝSING

um innheimtuhlutfall útsvars í staðgreiðslu á árinu 1990.

Með vísan til 1. mgr. 9. gr. laga nr. 45/1987, um staðgreiðslu opinberra gjalda, með síðari breytingum, sbr. 1. gr. laga nr. 42/1988 og 26. gr. laga nr. 73/1980, um tekjustofna sveitarfélaga, með síðari breytingum, sbr. 1. gr. laga nr. 33/1988, hefur innheimtuhlutfall útsvars í staðgreiðslu á árinu 1990 verið ákveðið 6,99%.

Fjármálaráðuneytið, 28. desember 1989.

Ólafur Ragnar Grímsson.

Snorri Olsen.